

Rencana Pengarang

dan hujah-hujah dalam hal ini. Surat siaran itu ditandatangani oleh ketua-ketua dan setiausaha empat badan-badan Islam: Al-Rahmaniah, Persatuan Pelajar-pelajar Kolej Islam Petaling Jaya, Persatuan Mahasiswa Islam Universiti Malaya dan Persatuan Kebangsaan Pelajar Islam – Menyatakan sebagai berikut:

“Dari sumber-sumber rasmi yang dapat dipertanggungjawabkan, kami mendapati berita bahawa Haile Selassie, maharaja Ethiopia, akan melawat Malaysia sebagai seorang tamu negara yang terhormat pada 21 Mei 1968.

“Kami, bagi pihak badan-badan yang tercatit di bawah ini ingin menyatakan bahawa Haile Selassie adalah seorang musuh Islam yang ketat yang menindas dan menganiaya orang-orang Islam dan berbaik-baik dengan gerombolan Zionist yang memimpin negara Israel.

Di antara tindakan-tindakannya yang kejam terhadap umat Islam, ialah:

1. Perampasan wilayah Eritrea dan penindasan terhadap kaum Muslimin di sana;
2. Pembunuhan, penganiayaan dan pembenterasan terhadap orang-orang Islam dan kebudayaan Islam di Ethiopia;
3. Perhubungannya yang rapat dengan pemimpin-pemimpin Zionism yang membina negara Israel dan merampas wilayah-wilayah negeri Arab, yaitu negara yang tidak diiktirafkan oleh Malaysia;

4. Sikap munafiknya terhadap pemimpin-pemimpin Islam di dunia Islam di dalam mana beliau menyatakan simpatinya terhadap penderitaan orang-orang Arab Palestin, tetapi di tempat yang lain pula beliau menyatakan pengakuannya terhadap negara Israel atas alasan-alasan “sejarah dan polisi negara.”

.... Berdasarkan maklumat-maklumat yang detail yang didapati dari sumber-sumber antarabangsa yang dapat dipertanggungjawabkan dan yang kami lampirkan bersama ini ini², maka kami menyatakan bahawa:

1. Membenarkan Haile Selassie datang ke Malaysia adalah satu tamparan pedih terhadap umat Islam di negara ini yang saudara-saudara seagamanya di Ethiopia dan Eritrea sedang teraniaya di bawah cengkaman kuku besi Haile Selassie;
2. Adalah memalukan bagi umat Islam bahawa pemimpin-pemimpin mereka yang beragama Islam di negara ini, di kalangan

pemerintah, sudi membenarkan musuh Islam yang ketat ini melawat negara ini;

3. Perbuatan ini akan menunjukkan bahawa pemimpin-pemimpin beragama Islam di negeri ini rela bersyarakat (bersekutu) dengan senang dengan seorang pemimpin yang menindas saudara-saudara seagama di Ethiopia dan Eritrea, menafikan hak-hak asasi manusia yang penuh kepada mereka, dan menjadi tali barut golongan Zionis.

Dengan ini, kami bagi pihak badan-badan di atas yang mewakili suara dan sentimen umat Islam Malaysia, membantah keras terhadap pihak berwajib mengizinkan Haile Selassie melawat Malaysia dan meraikannya sebagai tamu terhormat negara.

Sekian siaran mereka yang patut diperhatikan oleh umat Islam di Malaysia. Bagaimana keadaan yang lebih nyata dalam soal ini baca “Surat Terbuka” di lain muka keluaran ini.



Kampung “Al-Karamah” di Jordan, adalah sebuah kampung pertanian yang tidak dikawal dijadikan sasaran serangan kapal terbang-kapal terbang pejuang Israel. “Al-Karamah terletak sejauh 3 batu dari Sungai Jordan.

² Perkataan “ini” diulang dua kali dalam teks Jawi.